



O‘ZBEKISTON RESPUBLIKASI PREZIDENTINING QARORI

2021 yil « 4 » октябрь

№ ПҚ–5255

Болаларни қўллаб-қувватлаш жамоат фонди фаолиятини ташкил этиш чора-тадбирлари тўғрисида

2017–2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясини “Ёшларни қўллаб-қувватлаш ва аҳоли саломатлигини мустаҳкамлаш йили”да амалга оширишга оид Давлат дастурида белгиланган вазифалар ижросини таъминлаш, шунингдек, эҳтиёжманд оилаларнинг фарзандларини, чин етимларни, оғир касалликка чалинган ва ногиронлиги бўлган болаларни даволаш, уларнинг таълим олишини, уй-жой билан таъминланишини ҳамда касб эгаллашларини қўллаб-қувватлаш мақсадида:

1. Олий Мажлис палаталари ва Вазирлар Маҳкамасининг Болаларни қўллаб-қувватлаш жамоат фондини (кейинги ўринларда – Болалар жамоат фонди) ташкил этиш ва унга муассислик қилиш тўғрисидаги таклифи маъқуллансин.

2. Қуйидагилар Болалар жамоат фондининг энг муҳим вазифалари этиб белгиланганлиги маълумот учун қабул қилинсин:

оғир вазиятга тушган, ижтимоий ҳимояга муҳтож болаларни аниқлаш ва уларга манзилли ижтимоий ва моддий ёрдам кўрсатиш тадбирларини ташкил этиш ва молиялаштириш;

болаларнинг ҳаёти учун хавф солувчи оғир, сурункали ҳамда кам учрайдиган (орфан) касалликларга ўз вақтида ташхис қўйиш ва уларни республикада ёки зарур ҳолларда хорижий давлатларда даволаш учун тиббий, ижтимоий ва молиявий ёрдам кўрсатишнинг қўшимча механизмларини жорий этиш;

эҳтиёжманд оилаларнинг фарзандлари ҳамда **имконияти чекланган болаларни бепул дори воситалари, тиббий ва протез-ортопедик буюмлар билан таъминлаш;**

жисмоний ёки психик ривожланишида нуқсони бўлган болаларни таълим олишларида кўмаклашиш, шу жумладан махсус ўқув адабиётлар ва ўқув қуроллари билан таъминлаш;

ногиронлиги бўлган болаларни ижтимоий мослаштириш, уларга қизиқишларидан келиб чиқиб касб-ҳунар ўргатиш ва уларни уй шароитида ўзини ўзи банд қилиши учун асбоб-ускуналар билан таъминлаш;

оғир ташхисли касалликлари бўлган болаларни парвариш қилаётган кам таъминланган оилаларни ҳомийликка олиш;

ногиронлиги бўлган болаларни ижтимоий қўллаб-қувватлашга, шу жумладан уларга **юқори технологик ихтисослашган реабилитацион ёрдам кўрсатишга доир тадбирларни** ташкил этиш ва молиялаштириш.

3. Қўйидагилар:

Болаларни қўллаб-қувватлаш жамоат фондининг **Васийлик кенгаши** таркиби 1-иловага мувофиқ;

Болаларни қўллаб-қувватлаш жамоат фонди Васийлик кенгашининг ёрдамчи органи сифатида **Экспертлар гуруҳи** таркиби 2-иловага мувофиқ;

Болаларни қўллаб-қувватлаш жамоат фонди **ижро дирекциясининг** бошқарув ходимлари чекланган сони **10 нафар** бўлган тузилмаси 3-иловага мувофиқ;

Болаларни қўллаб-қувватлаш жамоат фонди ижро дирекцияси томонидан жисмоний ва юридик шахсларнинг **ҳомийлик ёрдамларини олиш** бўйича мурожаатларни қабул қилиш ва кўриб чиқиш схемаси 4-иловага мувофиқ маъқуллансин.

4. Маълумот учун қабул қилинсинки:

Болалар жамоат фонди **бошқарувининг юқори органи** унинг муассислари **умумий йиғилиши ҳисобланиб**, ушбу йиғилиш ҳар йили камида бир марта ўтказилади;

Болалар жамоат фондининг Васийлик кенгаши Болалар жамоат фонди бошқарувининг **умумий йиғилишлари** оралиғидаги **раҳбар органидир**;

Болалар жамоат фонди ижрочи директори лавозимга Болалар жамоат фондининг Васийлик кенгаши томонидан **муассислар умумий йиғилиши тақдимномасига мувофиқ** тайинланади ва лавозимидан озод қилинади;

Болалар жамоат фонди ижро дирекциясининг штат бирликларини сақлаш билан боғлиқ харажатлар унинг **шакллантирилган маблағлари ҳисобидан қоплаб борилади.**

5. Болалар жамоат фондининг асосий пул маблағлари қуйидагилар ҳисобига шакллантирилади:

Давлат бюджети ҳисобидан 2021–2022 йилларда маблағларни амалда ўзлаштирилишига қараб **100 миллиард сўм** миқдоридаги беғараз молиявий ёрдам;

жисмоний ва юридик шахсларнинг **ихтиёрий хайриялари**;

давлат, хорижий ва халқаро ташкилотлар, **чет давлатлар ажратадиган грантлар**;

краудфандинг механизмлари орқали келиб тушган маблағлар;

вақтинча бўш турган маблағларни тижорат банклари **депозитларига жойлаштиришдан** олинган даромадлар;

қонунчилик ҳужжатларида тақиқланмаган бошқа манбалар.

Молия вазирлиги (Т.Ишметов) Болалар жамоат фонди Васийлик кенгашининг (Б.Мусаев) асосланган ҳисоб-китобларига мувофиқ Болалар жамоат фондининг асосий вазифаларини амалга ошириш учун зарур маблағларнинг Давлат бюджети параметрларида назарда тутилишини таъминласин.

6. Белгилаб қўйилсинки:

Болалар жамоат фондига **ҳомийлик қилинган маблағлар** солиқ базасини аниқлашда чегириб ташланадиган харажатлар жумласига киритилади;

Болалар жамоат фонди **солиқларнинг барча турларидан озод этилади** (ижтимоий солиқ бундан мустасно).

7. Белгилансинки, 2024 йил 1 январга қадар даволанишга муҳтож бўлган болалар учун белгиланган тартибда тасдиқланадиган рўйхатлар бўйича Болалар жамоат фонди томонидан олиб келинадиган дори воситалари, тиббиёт ускуналари ва протезлаш воситалари божхона тўловларидан (қўшилган қиймат солиғи ва божхона расмийлаштируви йиғимларидан ташқари) озод қилинади.

8. Болалар жамоат фондига:

Ўз маблағларини олувчилар кесимида, шу жумладан **уларнинг шахсини очиқламаган ҳолда** ёши, жинси, ижтимоий ҳолати ҳамда молиялаштириш манбаи кесимида, шунингдек, Давлат бюджетидан ажратиладиган маблағлар ва уларнинг ижроси тўғрисидаги маълумотларни ҳисобот ойининг якуни билан кейинги **ойнинг 25-санасига қадар расмий веб-сайтига жойлаштириб бориш;**

Ўз маблағларининг сарфланишига доир масалаларни муҳокама қилишга **жамоатчиликни жалб этиш;**

фаолиятининг аудиторлик текшируви натижалари ҳисоботини кенг жамоатчиликка, шу жумладан **оммавий ахборот воситалари, фуқаролик жамияти институтлари, халқаро ва бошқа ташкилотларга тақдим этиб бориш** тавсия этилсин.

9. Болалар жамоат фонди Васийлик кенгаши (Б.Мусаев):

а) 2021 йил 20 октябрга қадар Болалар жамоат фонди ижро дирекциясини юқори малакали кадрлар билан тўлдириш ҳамда Болалар жамоат фонди уставини тасдиқлаш чораларини кўрсин;

б) 2021 йил 15 ноябрга қадар манфаатдор вазирлик ва идоралар билан биргаликда кенг жамоатчилик фикрини ва илғор хорижий тажрибани ҳисобга олган ҳолда, шу жумладан қўйидагиларни назарда тутувчи “Болаларни қўллаб-қувватлаш жамоат фонди тўғрисида”ги қонун лойиҳасини **ишлаб чиқсин ва белгиланган тартибда Олий Мажлис Қонунчилик палатасига киритилишини таъминласин:**

Болалар жамоат фондининг мақоми, фаолияти кафолатлари, **ҳуқуқ ва мажбуриятлари;**

Болалар жамоат фондининг **давлат органлари ва ташкилотлар билан ўзаро ҳамкорлиги;**

Болалар жамоат фонди фаолиятини молиявий таъминлаш ва маблағларидан **фойдаланиш тартиби;**

Болалар жамоат фондига **ҳомийлик қилган шахсларга имтиёз ва преференциялар бериш** ҳамда унинг фаолиятини давлат томонидан қўллаб-қувватлаш ва рағбатлантириш тартиби;

в) 2021 йил 1 декабрга қадар Болалар жамоат фонди ҳисобидан унинг платформаси ва ягона **электрон базаси фаолиятини йўлга қўйсин** ҳамда Болалар жамоат фонди фаолияти тўғрисидаги батафсил маълумотларнинг **платформада жойлаштириб борилишини** ва оммавий ахборот воситалари орқали кенг тарғиб этилишини таъминласин.

10. Тошкент шаҳар ҳокимлиги (Ж.Артикходжаев) Давлат активларини бошқариш агентлиги (А.Ортиқов) билан биргаликда **бир ой муддатда** Болалар жамоат фондиди текин фойдаланиш ҳуқуқи асосида унинг фаолиятини **самарали ташкил этиш учун зарур шароитларга эга бўлган** мақбул бинога жойлаштиради.

11. Ёшлар ишлари агентлиги Молия вазирлиги билан биргаликда икки ой муддатда қонунчилик ҳужжатларига ушбу қарордан келиб чиқадиган ўзгартириш ва қўшимчалар тўғрисида Вазирлар Маҳкамасига таклифлар киритсин.

12. Мазкур қарор ижросини самарали ташкил этишга масъул ва шахсий жавобгар этиб соғлиқни сақлаш вазири **А.М. Хаджибаев**, халқ таълими вазири **Ш.Х. Шерматов**, бандлик ва меҳнат муносабатлари вазири **Н.Б. Хусанов** ҳамда молия вазири **Т.А. Ишметов** белгилансин.

Қарор ижросини ҳар чорақда муҳокама қилиб бориш, ижро учун масъул ташкилотлар фаолиятини мувофиқлаштириш ва назорат қилиш Ўзбекистон Республикаси Бош вазирининг ўринбосари **Б.А. Мусаев** зиммасига юклансин.

Амалга оширилаётган чора-тадбирлар натижадорлиги юзасидан Ўзбекистон Республикаси Президентига **2022 йил 1 мартга** қадар ахборот берилсин.

**Ўзбекистон Республикаси
Президенти**



Ш.Мирзиёев

Тошкент шаҳри

**Болаларни қўллаб-қувватлаш жамоат фонди Васийлик кенгаши
таркиби**

1. Б. Мусаев – Бош вазирнинг ўринбосари, *Кенгаш раиси*
2. М. Ходжаева – Олий Мажлис Қонунчилик палатаси Меҳнат ва ижтимоий масалалар қўмитаси раиси, *Кенгаш раиси ўринбосари*
3. Р. Маматов – маҳалла ва оилани қўллаб-қувватлаш вазири
4. Э. Мухитдинов – бандлик ва меҳнат муносабатлари вазирининг биринчи ўринбосари
5. Б. Онорбоев – мактабгача таълим вазирининг биринчи ўринбосари
6. У. Шарифходжаев – халқ таълими вазирининг биринчи ўринбосари
7. Э. Баситханова – соғлиқни сақлаш вазири ўринбосари
8. Ж. Аброев – молия вазири ўринбосари
9. С. Ашуров – Ёшлар ишлари агентлиги директорининг биринчи ўринбосари
10. К. Абдуллаев – Ўзбекистон ногиронлар жамияти раиси (*келишув асосида*)
11. А. Инаков – Тиббий-ижтимоий хизматларни ривожлантириш агентлиги директори
12. Т. Алиева – “ZAMIN” халқаро жамоат фонди директори
13. У. Турабов – Вазирлар Маҳкамасининг бош мутахассиси, *Кенгаш котиби*

Изоҳ: *Васийлик кенгаши аъзолари бошқа ишга ўтган тақдирда унинг таркибига ушбу лавозимларга янгидан тайинланган ёхуд зиммасига тегишли функцияларни бажариш юкланган шахслар киритилади.*

**Болаларни қўллаб-қувватлаш жамоат фонди Васийлик кенгашининг
Экспертлар гуруҳи
таркиби**

1. Б. Каримов – Тиббий-ижтимоий хизматларни ривожлантириш агентлиги директорининг биринчи ўринбосари, *гуруҳ раҳбари*
2. Ш. Амонов – Тошкент педиатрия тиббиёт институти кафедра мудури, тиббиёт фанлари доктори, профессор
3. М. Липартия – Республика ихтисослаштирилган онкология ва тиббий радиология илмий-амалий тиббиёт маркази шифокори, тиббиёт фанлари номзоди
4. А. Давлетьаров – Иқтисодий тараққиёт ва камбағалликни қисқартириш вазирлигининг Инсон капитални ривожлантириш департаменти директори
5. Р. Кливлеев – Молия вазирлигининг Аҳолини ижтимоий ҳимоя қилиш ва давлат ижтимоий хизматлари тармоқларида бюджет сиёсати департаменти бўлим бошлиғи
6. Л. Гайнутдинова – Халқ таълими вазирлигининг Психологик-педагогик республика ташхис маркази директори
7. Н. Умарова – “Ишга марҳамат” банд бўлмаган аҳолига хизмат кўрсатиш мономаркази директори
8. Т. Алиева – “ZAMIN” халқаро жамоат фонди директори
9. *Келишув асосида* – ЮНИСЕФнинг Ўзбекистондаги ваколатхонаси эксперти
10. *Келишув асосида* – БМТ Тараққиёт дастури ваколатхонаси эксперти
11. *Лавозими бўйича* – Болаларни қўллаб-қувватлаш жамоат фонди ижрочи директорининг ўринбосари, *гуруҳ масъул котиби*

Изоҳ:

Экспертлар гуруҳи аъзолари бошқа ишга ўтган тақдирда унинг таркибига ушбу лавозимларга янгидан тайинланган ёхуд зиммасига тегишли функцияларни бажариш юкланган шахслар киритилади.

Васийлик кенгашига Экспертлар гуруҳи таркибига ўзгартириш киритиш ҳуқуқи берилади.

Экспертлар гуруҳи таркибига келишувга кўра 1 нафар журналист ва 2 нафар блогер киритилиши мумкин.

Болаларни қўллаб-қувватлаш жамоат фонди ижро дирекциясининг тузилмаси



Ходимларнинг чекланган сони – 10 нафар.

Изоҳ: хизмат кўрсатувчи ва техник ходимлар сони ўрнатилган меъёрларга мувофиқ белгиланади.

**Жисмоний ва юридик шахсларнинг ҳомийлик ёрдамларини олиш бўйича
муурожаатларини қабул қилиш ва кўриб чиқиш
СХЕМАСИ**

Босқичлар	Субъектлар	Чора-тадбирлар	Бажариш муддатлари
Фуқаролар муурожаатларини кўриб чиқиш жараёни			
1-босқич	Болаларни қўллаб-қувватлаш жамоат фонди ижро дирекцияси	Жисмоний ва юридик шахслардан келиб тушган: ёзма (почта, факс орқали ёки шахсан) муурожаатлар; электрон шаклда келиб тушган (Болаларни қўллаб-қувватлаш жамоат фонди веб-сайти, Халқ қабулхонаси ва бошқа электрон почталар орқали) муурожаатлар; оғзаки (шахсий қабул ёки Call-марказ орқали) муурожаатлар кунлик ўрганиб чиқилади ва таҳлил қилинади.	Кунлик
2-босқич	Молия вазирлиги, Тиббий-ижтимоий хизматлар агентлиги	Муурожаатлар қўйидагилар асосида кўриб чиқилади: муурожаатчининг эҳтиёжи ва сўрови Болаларни қўллаб-қувватлаш жамоат фондининг мақсадлари ва вазифаларига мувофиқлиги; муурожаатчининг оилавий аҳволи ва имкониятларини (шу жумладан, Ижтимоий ҳимоя ягона реестри ва Тиббий-ижтимоий экспертиза дастурий таъминоти маълумотлари асосида, шунингдек, жойларга чиққан ҳолда) ўрганиш.	Кунлик
	Вазирлик ва идоралар	Ўрганиб чиқилган муурожаатлар ҳомийлик ёрдамини кўрсатиш йўналишлари бўйича гуруҳлаштирилади ҳамда тегишли вазирлик ва идоралардан мазкур йўналишлар бўйича ёрдам кўрсатиш мақсадга мувофиқлиги юзасидан маълумот олинади*.	Икки ҳафта муддатда
Ҳомийлик амалга оширилишини экспертизадан ўтиш жараёни			
3-босқич	Болаларни қўллаб-қувватлаш жамоат фонди ижро дирекцияси	Экспертлар гуруҳига касалликка чалинган болалар рўйхати, зарур дори воситалари, бошқа воситалар ва моддий ёрдамлар юзасидан чора-тадбирлар қиймати ва молиялаштириш суммаси бўйича маълумотлар тақдим этиб борилади.	Ой якуни билан, кейинги ойнинг 5 санасига қадар
	Экспертлар гуруҳи	Экспертлар гуруҳи: даволаш муолажалари ва амалиётлар ўтказилиши тиббий кўрсатмаларга (ташхисларга) мувофиқлиги; касалликка нисбатан даволаш муолажалари ва амалиётлар ўтказилишига тиббий қарши кўрсатмалар мавжуд эмаслиги; ижтимоий ҳимояга муҳтож болаларни даволаш, шу жумладан чет элда даволаш зарурлиги; махсус доривор препаратлар, протез-ортопедик буюмлар ҳамда махсус ўқув адабиётлари ва ўқув қуроллари зарурлиги бўйича хулосалар беради.	Ҳар икки ҳафтада

	Болаларни қўллаб-қувватлаш жамоат фонди ижро дирекцияси	Товарлар, хизматлар ва дори воситалари ўрнатилган тартибда харид қилинади, моддий ёрдамлар ва бошқа чора-тадбирлар молиялаштирилади.	3 кун ичида
--	---	--	-------------

Назорат ва ҳисобдорлик тизими

4-босқич	Болаларни қўллаб-қувватлаш жамоат фонди ижро дирекцияси	Фонддан маблағ олувчилар кесимида ҳамда молиялаштириш манбаси кесимида маълумотларни ҳар ой якуни билан расмий веб-сайтига жойлаштириб боради.	Ҳар ойнинг 25 санасига қадар
	Болаларни қўллаб-қувватлаш жамоат фонди ижро дирекцияси	Маблағларнинг сарфланиши масалалари кенг жамоатчиликни жалб этган ҳолда оммавий ахборот воситаларида муҳокама қилиб борилади.	Ҳар ойда
	Болаларни қўллаб-қувватлаш жамоат фонди тафтиш комиссияси	Аудиторлик текшируви натижалари ҳисоботи кенг жамоатчилик, шу жумладан оммавий ахборот воситалари, фуқаролик жамияти институтлари, халқаро ва бошқа ташкилотларга тақдим этилади.	Ҳар йилнинг март ойига қадар
	Болаларни қўллаб-қувватлаш жамоат фонди Васийлик кенгаши	Болаларни қўллаб-қувватлаш жамоат фонди ижро дирекциясининг амалга оширган ишлари, чора-тадбирлари, маблағларнинг мақсадли сарфланганлиги ҳамда келгуси йил учун белгиланган муҳим вазифалар тўғрисидаги ҳисоботи эшителиди.	Ҳар йилнинг апрель ойига қадар

**Изоҳ: шошилинч тиббий хизмат ва кечиктириб бўлмайдиган бошқа ҳомийлик ёрдамлари истисно тариқасида Болаларни қўллаб-қувватлаш жамоат фондининг Васийлик кенгаши раисининг розилиги асосида амалга оширилиши мумкин.*

